

Regional News Unit AIR Aizawl
Tuesday, August 06, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Higher & Technical Education Minister Dr. Vanlalthlanan zirtirtu indaihlohna avanga harsatna chu Mizoram sorkar hnuaiia college zawng zawng tawh mek a nih avangin zirtirtu sem rual buaipui mek a ni a ti.
- Working Committee on Lengpui Airport chuan an airport dinhmun zirchianna report bu Chief Minister hnenah an hlan.
- Bangladesh buaina thleng mek chungchangah Prime Minister Narendra Modia kaihhruaiin nimin khan Cabinet Committee on Security chu New Delhi ah an thukhawm
- Zirlai te lungawilohna lantir avanga tharum thawhna nasa chho zelah Bangladesh Prime Minsiter Sheikh Hasina chu nimin khan a nihna atangin a bang.

<><><>

EDUCATION MINISTER

Higher & Technical Education Minister Dr. Vanlalthlanan zirtirtu indaihlohna avanga harsatna chu Mizoram sorkar hnuaiia college zawng zawng tawh mek a nih avangin zirtirtu sem rual buaipui mek a nih thu a sawi.

Nimin khan a pisa ah thutharlakhawmtute kawmin MZP hmalaknaa Govt. Champhai College—a Pol Science leh Economics zirtirtu indaihlohna avanga lungawi lohna lantira Champhai khaw chhunga zirna in leh sorkar pisa kai tur dan ani chu pawia tih thu a sawi a, Govt. Champhai College chu sorkarin a duhsak thu sawiin, RUSA 1, RUSA 2 leh PM – USHA atanga thuam that mek a nih bakah zirtirtu dah belh chungchangah pawh a hrana post siam belhna tura thutlukna siamsak an nih tawh thu a sawi a. Mizoram puma college zirtirtu khairual zawka kalpui a nih theih nan Sorkarin fimkhur taka hma a lak mek hrilhhriat an nih hnu pawha zirna leh sorkar tikhailak zawnga hmalak a ni chu pawia tih thu a sawi.

Minister chuan MZP Hqrs Champhai atangin May ni 3 leh July ni 18 khan lehkha dawn a nih thu sawiin lehkha dawn te hi Minister leh Commissioner hova sawi ho a ni a ti a. Zirtirtu sem rual chu sorkar hmalak mekna a nih avang leh hmun dang atang pawha lehkha dawn a nih avangin a rang thei ang bera thutlukna siam a ni a ti a. College pakhat tana a bika transfer lo tih hian zirchianna a tihbuai theih avangin MZP Hqrs Champhai chu an hmalakna chhonzawm lo tur leh zirtirtu semrualna kalpui mek chu lo ngaichang turin a ngen a ni.

Dr. Vanlalhlana chuan zirtirtu semrual kalpui tur chuan zirlai awm zat, zirtirtu hman theih zat, section awm zat, major leh multi- disciplinary paper la zat bakah zirtirtu posting history kimchang hriat a ngaih thu sawiin hmanhmawh taka tih chuan tihsual neih palh a hlauhawm avangin ngun taka zirchianna neih mek a nih thu a sawi a. Theih ang tawka chakin hmalak mek a nih thu sawiin Mizoram zirna leh zirlaite pawn rah tha a chhuah ngei a beisei thu a sawi.

Tun dinhmunah Govt. Champhai College ah hian Arts, Science, Commerce leh BCA course kalpui mek niin Commerce leh BCA hi Self – Finance Mode a kalpui a ni a. Mizoram state sorkar din college 20 zinga zirtirtu sanctioned pos atanga tehin Govt. Champhai College hi zirtirtu ngah ber dawttu niin Govt. Champhai College ah hian sanctioned post 44 neiin zirtirtu regular, contract, RUSA, part – time leh casual teacher 61 neiin sactioned post atanga tehin 138.64% a ni.



CM

Chief Minister Pu Lalduhoma hovin Mizoram State Disaster Management Authority (SDMA) chu nimin khan CM Conference Hall-ah an thukhawm.

SDMA chairman Pu Lalduhoma chuan, Cyclone Remal vanga chhياتna rawn endiktu Inter Ministerial Central Team ten an report an thehluh tawh thu leh Finance Ministry lama a awm mek thu a sawi a. Tanpuina engemaw zat pek an in beisei, a ti.

Meeting hian kumin March atanga May thla thlenga leilung chhياتna vanga chenna in chhia 4726 report a awm tawh thu te leh kumin chhunga disaster avanga nunna chan chhinchhiah mi 42 an awm tawh thu te tarlan a ni a, hei bakah hian Mizoram hmun rukah lirnghing tehna khawl (Seismic Observatory) dah mek a nih thu tarlan a ni bawk.

Meeting hian chhanchhuahna hmanrua engemawzat lei thar leh a tul ang zela a hmang tangkaitu tur khawtlang leh pawl hnena hlan te, Geology & Mining lam te hman tur Geotechnical Instruments pawimawh lei te an rel a. Hlimen leh Melthuma leiminin In leh lo a tihchhiatsak chhungkaw 41 te chen lailawkna tur siam a nih thute, Hlimen leh Melthuma hmun him tawk lova ngaih te umzui zel dan tur te an sawi a. Mihring chen tamna hmuna leimin thleng nasa thin tihnep nana tui luankawr mumal zawk leh khuarei daih siam dan tur zirtu tur study team din te pawh an sawi a ni.

Heng bakah hian African Swine Fever vanga harsatna tawk chhungkua te tanpui dan tur pawh sawiin; mumal zawka chhawmdawlina an hmuh theih dan tur ruahman siam ni se, an ti.

He meetingah hian DM& R Minister Pu K. Sapdanga, PWD Minister Pu Vanlalhlana, AH & Vety Minister Pu C. Lalsawivunga, Health Minister Pi Lalrinpuii, PHE Minister Prof. Lalnilawma, Supply Minister Pu B. Lalchhanzova leh Chief Secretary Dr. Renu Sharma bakah member dang te an tel a ni.



LENGPUI AIRPORT REPORT

Chief Minister Pu Lalduhoma, hnenah Adviser to CM Pu TBC Lalvenchhunga, kaihhruai Working Committee on Lengpui Airport te chuan an thil zirchianna report bu nimin khan an hlan.

Chief Minister chuan, huntiam chungang report fel fai tak peih hman anih avangin a lawm hle tih a sawi a, an report atangin an thawhrimzia chiang takin a lang a ni, a ti.

Committee chairman Pu TBC Lalvenchhunga chuan, sawrkarin huntiam a pek chungin report an peih hman a, amaherawhchu Chief Minister hnena hlan turin a zin lo haw hun remchang nghakin ruahmanna an siam tih a sawi a ni

Working Committee Member Secretary Pu Vanlaldina Fanai, Commissioner & Secretary, GAD pawhin thusawiin, Working Committee hian Airport enkawl zel dan tur thutlukna a siam lova, thutlukna hi Council of Minister kuta awm a ni a. Committee chuan zirchianna a theih anga chipchiarin an buatsaih a ni, a ti.

Report thelhuhaah hian Pu Lalrohlua, Director, Aviation & Member, Working Committee chuan an zirchian dan presentation a pe a ni.



AMC BY ELECTION

Aizawl Municipal Corporation (AMC) Ward-VI Bye-Election neih turah MNF leh MPCC chuan candidate inṭawm siamin, bialtu corporator nupui Pi Lalrinfeli an dah.

Chanmari West, Edenthlar leh Hunthar awmna Ward VI bialtu corporator Pu John Zosangliana Ralte a thih avangin inthlan that tur hi puan a ni a, MNF leh MPCC Common Candidate Pi Lalrinfeli hi Ward-VI Corporator thi ta Pu John Zosangliana Ralte nupui a ni a. AMC Ward-VI hmasawn zel nan leh Corporator hmasa Pu John Zosangliana hnathawh leh hmachhawp mekte chhunzawm turin MNF leh MPCC chuan lungrual takin an thlang tih nizan khan an puang a ni.

Ward-VI Corporator hmasa Pu John Zosangliana Ralte chu kumin March ni 21 khan an chungkuua an zinnaah a thi a. A bial Ward-VI chu a ruah tak avangin tun thla ni 22-ah Bye-Election buatsaih a ni dawn a ni.

MNF & MPCC Common Candidate Pi Lalrinfeli election symbol hi 'mipa leh hmeichhia' inkai lai a ni ang a. Hei hian Bye-Election lo awm turah MNF leh MPCC chu inlungual takin an thawkho tih a entir tih party pahnih thuchhuah intawm chuan a sawi a; Candidate Pi Lalrinfeli hian a pasal hnathawh mek leh hmachhawpte chu pumkhat an nih angin theihtawpin a chhunzawm dawn a ni tih a entir bawk.

<><><>

LADC

Lai Autonomous District Council Chief Executive Member Pu C. Lalmuanthanga chuan nimin khan a Department enkawl, Environment, Forest and Climate Change, Department hotute a kawm a.

Pu C. Lalmuanthanga chuan LADC Sorkar chuan Sorkar atanga sum a hmuh piah lamah sum hailut tura nasa zawka tan lak a pawimawh thu a sawi a. Environment, Forest and Climate Change, Department chu chhiah lakkhawm kawngah Department thawhhlawk tak a ni chu chhuanawm a tih thu sawiin, chhiah tam zawk hailut tura tan la turin thawktute a chah.

Environment, Forest and Climate Change, Department hotute chuan Department hmalakna tlangpui leh mamawh an neih te Chief Executive Member hnenah hian an thlen a, CEM chuan a tul anga lo enzui a tum thu a hrilh a ni.

<><><>

BANGALADESH VIOLENT

Bangladesh buaina thleng mek chungchangah Prime Minister Narendra Modia kaihhruiin nimin khan Cabinet Committee on Security chu New Delhi ah an thukhawm. He thutkhawmah hian External Affairs Minister Dr. S. Jaishankar, Union Home Minister Amit Shah, Defence Minister Rajnath Singh, Union Finance Minister Nirmala Sitharaman leh mi pawimawh dangte an tel a ni.

Bangladesh-ah hian zirlai te lungawilohna lantir avanga tharum thawhna nasa chho zelah Bangladesh Prime Minsiter Sheikh Hasina chu nimin khan a nihna atangin a bang a. Sipai helicopter hmangin an ram chhuahsan nghal a ni. Prime Minister ban thu hi Army Chief General Waker-Uz-Zaman chuan tichiingin sipaiten sawrkar lailawk an kaihhrui tur thu a puang a. Ramchhung mipuite chu dawhthei taka awm tur leh remna vawng nung hram hram turin a ngen a ni.

Bangladesh media te sawidanin PM Hasina hi a chenna hmun Gonobhaban-ah lungawilohna lantir mi za chuang an luh avangin hmun him lamah a tlanchnia a.

Pathianni khan mipui lungawilo leh police te intawngnaah mi 100 chuang an thi a, mi 1000 chuangin hliam an tuar a ni.

Puan tawh angin Bangladesh ah hian sawrkar hnaah kum 1971 a Pakistan laka Bangladesh zalenna sualtute tu leh fate tana zaa 30 hauhsak anih duh loin zirlai tam takin lungawilohna an lantir a. Thla hmasa atang khan buaina hi a intan a ni.

Hetihlai hian Air India chuan Bangladesh-a lut leh chhuak an thlawhna thlawk zawng zawng nimin atang khan an titawp nghal a ni.

<><><>

PARIS OLYMPIC

Paris Olympic neih mekah India hmeichhe Table Tennis team te chuan quarterfinal an lut a. India hmeichhe team ah hian Manika Batra, Sreeja Akula, leh Archana Kamath te awmin nimin khan Romania team 3-2 in an pre-quarterfinal ah an hneh a. Heti hian quarterfinal an inhlangkai a ni.

Badminton mipaah Lakshya Sen chuan medal la zo lovin bronze medal inchuhnaah Malaysian player Lee Zii a hneh lo a ni.

A pumpuiah China chuan Gold Medal 21 lain pakhatna a hauh mek a. US in gold 20 la tawhin an dawt a. France chuan 13 lain pathumna an ni mek a. India chuan bronze 3 la in 60-na a ni mek a ni.

